

老子內傳

《老子內傳》：「太上老君姓李氏，名耳，字伯陽；其母曾見日精下落如流星，飛入口中，因有娠，七十二歲而生；常有五色雲繞其形，五行之獸衛其堂，於陳國渦水李樹下剖左腋而生。」又曰：「鶴發龍顏，廣頰長耳，大目疎齒，方口厚唇；額有參牛達理，日角月懸鼻；純骨有雙柱；耳豎大三門，頂有日光；身滋白血，面凝金色，舌絡錦文；形長一丈二尺，齒有四十八。受元君神圖寶章變化之方，及還丹伏火水汞液金之術，凡七十二篇。」

後魏《釋老志》曰：「其為教也，蠲去邪累，澡雪心神，積行立功，累德增善，乃有白日昇天，長生世上；又有三元九府百二十官一切諸神，咸所統攝焉。」

